



**Sud Bosne i Hercegovine**  
**Sud Bosne i Hecegovine**

---

**Broj: S1 3 Iž 037894 20 Iž**  
**Sarajevo, 22.10.2020. godine**

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Srete Crnjaka i Dinke Bešlagić-Čovrk kao članova vijeća, odlučujući o žalbi Ninić Nemanje, Betanj bb, Šekovići, Bosna i Hercegovina, koji osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je adresa iz njegove prijave, adresa sa koje je podnesena prijava za umrlu osobu.

Žalitelj Ninić Nemanja je, putem e-maila drugog lica, protiv navedene odluke blagovremeno izjavio žalbu u kojoj moli da mu se omogući glasanje izvan Bosne i Hercegovine putem pošte sa druge adrese od one navedene u prijavi za glasanje iz inostranstva.

Centralna izborna komisija Bosne i Hercegovine u odgovoru na žalbu predlaže da se žalba odbaci kao nedopuštena, odnosno da se odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, provjerom i uvidom u službene evidencije, utvrdila da je Centralnoj izbornoj komisiji BiH dostavljena prijava za umrlu osobu Krstić Jovanu za koju je evidentirana promjena o smrti dana 28.01.2019. godine. U navedenoj fiktivnoj prijavi u obrascu prijave za upis birača u CBS za glasanje izvan BiH-PRP 1, u rubrici „Adresa boravka van BiH na koju će biti upućen glasački materijal“ pod tačkom 1. kao primatelj pošiljke je naveden Pavlović Drago, a adresa privremenog boravka Marka Kraljevića 22, Zrenjanin.

Centralna izborna komisija BiH je prilikom razmatranja prijave Ninić Nemanje, utvrdila da je u obrascu potvrde prijave za glasanje van BiH, za podnositelja žalbe navedena ista adresa kao i adresa sa fiktivne prijave za umrlog Krstić Jovana. Stoga je pravilno odbijena prijava žalitelja u cilju spriječavanja zloupotrebe u izbornom procesu i činjenice da je adresa privremenog boravka, odnosno adresa na koju treba uputiti glasački materijal, ista i za osobu za koju je utvrđeno da je umrla.

Napomene radi, žalioocu nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A  
Vesna Trifunović**